

HEADLINES (EVENING)

1. Sorkar chuan Mizoramah nitin mamawh eitur leh tuilahthei te dan pangngaiin chawk luh reng a ni tih a sawi .
2. Sawrkar laipui Ministry of Information & Broadcasting hnuaiia PIB Press Tour Team ten vawiin khan Larsap General (Retd) Vijay Kumar Singh chu Lok Bhavan-ah an kawm .
3. Sawrkar laipui chuan tuialtheia chhiah a lak a ti hniam
4. Ramchhunga state hrang hragna commercial LPG sem zat zaa 70 in sawrkarin a ti pung

<><><>

OIL & GAS

Food, Civil Supplies & Consumer Affairs Dept chuan Mizoramah nitin mamawh eitur leh tuilahthei te dan pangngaiin chawk luh reng a ni tih an sawi a, tun dinhmunah mipui supply pek kawngah harsatna a thlen loh thu a sawi a ni.

Supply Dept secretary Pi Teresy Vanlalhruii chuan, eirawngbawlna gas leh tuialhthei te chu Mizoramah ni tin a lo thleng reng tih a sawi a. Khaw thlang lama Indo a awm avangin mi thenkhat chuan eirawngbawlna Gas leh tuialhthei a harsat hlau in an inla khawl a, amaherawhchu hlawuhthawn ang te thleng lovin heng supply te hi a pangngai rengin a rawn thleng a ti a, tun dinhmunah chuan hlauthawn tur a awm lo niin a sawi bawk.

Pi Teresy Vanlalhruii chuan tul lo a mipui lamin Gas leh tuialhthei an lak lawk vak vak loh nan Gas chu book hnuhnun ber atanga ni 25 hnuah chauh a book leh theih tih a sawi a, hei hi mi thenkhat in midang chan ve tur an lo lak heksak lutuk tur venna a ni a ti.

(Vawiin March ni 27, Zirtawpni hian Akashvani News Aizawl chuan Aizawl khawpui chhunga Filling Station hrang hrang kan tlawh kual a, petrol leh diesel a awm tha a, petrol pump-ah mipui an intlar tam lutuk lo bawk, dan pangngai angin Oil hi pek chhuah a ni a, harsatna lian tham a thlen hriat a ni rih lo.)

<><><>

MJA

Mizoram Journalists' Association (MJA) chuan vawiin khan Aizawla I&PR Auditorium-ah General Conference vawi 52-na an hmang a, President atan Zalen Editor Pu Vanlalrema Vantawl chu thlan a ni.

Kum 2026-2028 chhunga an hruaitu tur hi thlangin President bakah Vice President atan C. Lalhmachhuana (Youth Herald) an thlang a, chuhtu awm loin Zohmingmawia (The Aizawl Post) chu a tling bawk. Office Bearer pathum bakah hian Executive Member 11 an thlang chhuak bawk a ni..

MJA General Conference hi Finance Department Secretary Pu Ramchuana chuan a hmanpui a, thusawiin Pu Ramchuana chuan Chanchinbu mite chu chawlh pawh nei mumal lo khawp a thawkrim an ni tih a sawi a. Social Media karah Journalist-te chu thudik chauh chhuah tur leh an thu chhuah reng rengah tan lam nei lo a, an thu ziah te chu midang ti na lo thei ang ni turin leh mimal zalenna inzahsak tawn turin a chah bawk a ni.

MJA President Pu C. Lalrambuatsaiha chuan, MJA member-te chu teirei peih turin a chah a, sorkar hmalakna fak tlak a awm a nih chuan fak hreh lo a, an kal dik tawk lohna lai a awm a nih chuan huaisen taka puang chhuak ngam turin a chah a. Thu chhuah tur duh lutuk vanga thupuarpawheng buaipui lo a, mipui te tan thudik puang chhuak turin a chah bawk a ni.

Tun dinhmunah MJA Member 191 an awm mek a, an zinga 92 chu General Headquarters (Aizawl) a mite an ni a, record atanga a lan danin MJA hi kum 1972 March 23 a din niin member nih laia chatuan ram pan mi 76 an awm tawh a ni.

<><><>

PRESS TOUR MEMBERS VISIT LOK BHAVAN

Sawrkar laipui Ministry of Information & Broadcasting buatsaiha Sawrkar project hrang hrangte zirchiang tura Mizoram tlawha rawn zin, PIB Press Tour Team ten waviin khan Larsap General (Retd) Vijay Kumar Singhchu Lok Bhavan-ah hmuin an kawm a.

Larsap chuan Mizoram chu state te leh mihring tlemna ni mah se, ram pahnih Myanmar leh Bangladesh kar cheha awm anih avangin India rama hmun pawimawh tak leh, Act East Policy-a hmun langsar tak chang pha anih thu a sawi a. Ramri lehlama chengte nena inlaichinna tha tak nei anih avangin boruak a ralmuan thu leh buaina lian tham chhuak a awm meuh loh thu a sawi a. Tunhmain Mizoram chu ram buai ni mah se, Mizoram Peace Accord, 1986 ziah hnuah state ralmuang tak anih tak thu sawiin, tunhnaiah India rama ziak leh chhiar thiam vekna state hmasa ber leh sawhthing khawpui 'Ginger Capital of India' a puan anih thu a sawi a; hmasawna dangte pawh chak taka kalpui chhoh zel anih thu a sawi bawk.

Larsap chuan Bairabi-Sairang New Railway Line chu danglamna lian thlentu a ni tih sawiin, Zorinpui thleng turin chhim lamah km 200 chuang a thui siam chhunzawm tum anih thu leh, Kaladan Multi-Modal Transit Transport Project (KMMTTP) va pawha, Paletwa leh Sittwe Port, Myanmar nena thlunzawm tum a ni, a ti a. A zawh fel hunah chuan Mizoram mai bakah hmarchhak state leh India ram pum tana hmasawna lian thlentu anih dawn thu a sawi a ni.

PIB Press Tour Team-te hi , Punjab leh Himachal Pradesh atanga lokal member 8 te an ni a, an cham chhunga Mizoram an hmuh dante leh hmasawn zel tura pawimawh ni a an hriatte Larsap an sawipui a. Mizoram chu mawi an tih thu leh traffic dan tha taka zawm a nite, bengchheng ngaimawh tur a awm lote, khua leh tuite'n inthunna tha neia dan an zawm tha chu entawntlak an tih thu an sawi bawk.

Press Tour Team-te hian tun thla ni 22 khan Mizoram lo thlengin Sairang Railway Station, Thenzawl Solar Plant, Akashvani, PIB Office, DDK Aizawl leh khualhip nasa Reiek te an tlawh a, I&PR hotute leh MJA member-te an kawm a. Naktuk hian an haw ang.

<><><>

ARMY RECRUITMENT AWARENESS

Siahaa Government Saiha College-ah India Sipaia tan tumte tan Agnipath scheme chungchang kawng inkawhmmuhna hun waviin khan hman a ni.

Aizawla Army Recruiting Office buatsaih he hun hmannaah hian Government Saiha College zirlai leh National Cadet Corps (NCC) member-te an tel a ni.

Sipaia tan tumte tan online-a dilna thehluh dan video an enho bakah sipai nunchan hlimthla an thlirho bawk. Online registration hi April 1, 2026 thleng a tih theih a, chiang zawka hre duh tan www.joinindianarmy.nic.in ah en theih a ni.

<><><>

MIZO BIRDS EYE CHILI

Mission Organic Mizoram (MOM) enkawl Company te kaltlangin Mizo Hmarcha chu kumina a vawi khat nan hralh chhuah a ni.

MOM enkawlna hnuaiha hian Farmers Producer Company (FPC) pali – Bungzawl Organic FPC; Chamdur Organic FPC; Laitlang Organic FPC leh Lairam Organic FPC te an awm a, anni thar chhuah thar chhuah Mizo Hmarcha (Mizo Birds Eye Chilli) Metric Ton 4.1 hi ITC Ltd., Agri Business Division, Guntur, Andra Pradesh hnenah Premium Price cheng 480/- in hralh a ni.

Organic Mizo Chilli hralh chhuahte hi Agriculture & Farmers' Welfare Department Director leh MOM Mission Director Pi Vanramthangin Ch. Chhunga Bus Terminal, Thuampui atangin nimin tlai khan a vailiam a. Loneitu ten Organic Mizo Hmarchate an hralhna man Cheng 19,68,000/- hi a an dawng nghal vek a ni.

<><><>

FISHERY

Tamdil chungchang leh a tihchangtlun dan tur te senin Fisheries Department Secretary Pu Lalrothangan vawiin khan Tamdil a tlawh a. Forest Department te nen hmalakna tur sawihovin, Tamdil ah hian lei lut a tam hle a, dil luanchhuah na lam a tui put ru te enfiah in a siamthat dan tur te sawiani.

Saitual District-in sangha thar chhuah lamah hma a sawn theihna turin Fisheries Department hmunhma te en fiah a ni a, sangha chi siamna leh dil lo awm tawh te thawm that a ngaih tawh thu sawiho a ni. Hei bakah hian Fisheries Department farm hi sangha chi siam chhuah leh khawi nan chauh ni lovin, zirlai leh sanghakhawitute tan zirtirna hmun pawimawh tak a nih theih dan a sawi a ni.

Fisheries Department Secretary chuan Fisheries Department hi ecotourism lamah pawh thawh hlawk tak leh sum thawkchhuak tam thei tak ni in a ngai a. Khuarel thil hmang tangkai chung leh tih hmasawna kawng leh a humhalh na lam kawnga, tourism tih hmasawn na lama entawn tlak leh tangkai tak tur ni in a ngai a, District Fisheries Development Officer's Office tlawh in a hmunhma te endik in, tih changtlun dan awmthei te sawiho ani. Hemi ni vek hian Khawzawl Tuisen Phai zau Leilet neitute nen a inkawm ho in, tuikhuah siam dan turte sawiho ani a. Fisheries Department hnuai mimal Sangha chi siamna a tlawh nghal bawk. Hemi hnu hian Champhai District a mimal Sanghachi siamna hmun a tlawh nghal ani.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Chanchinthar hi naktuk zing dar 7 leh a chanve-ah puan leh a ni ang.

<><><>

FUEL

Sawrkar laipui chuan tuialtheia chhiah a lak a ti hniam. Vawiin khan Union Finance Minister Nirmala Sitharamani chuan social media lamah he thu hi tarlangin Petrol leh diesel-a chhiah Central excise duty a lak chu litre khatah cheng 10 in a tihniam a. West Asia dinhmun thlir chungin sawrkar laipui chuan hetiang hian ruahmanna a siam a ti a. Hetianga chhiah tihlem anih avang hian mipuiten thil man sang an tawrh tur pawh a ven an beisei tih Union Finance Minister chuan a sawi.

<><><>

COMMERCIAL LPG

Ramchhunga state hrang hragna commercial LPG sem zat zaa 70 in sawrkarin a ti pung. Hei bakah hian industry te tana pek chhuah pawh zaa 20 a tihpun a ni a. Heng industry zingah hian steel, automobiles, textile leh hlawhfa mamawh tam zual industry te an ni a. Union Petroleum and Natural Gas Minister Hardeep Singh Puri chuan ramchhunga Commercial LPG semnaah harsatna ti tlem turin theihtawp a chhuah a ti a. Pipe gas hman theihlohna industry te an ngaipawimawh zual dawn tih a sawi a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 132-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>